



KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

01 Mars 2019

23 Jamadi'ul Aakhir 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

DANGERS DE BANE RÉSEAUX SOCIAUX

Ki sanlà pas conne Facebook, Youtube, WhatsApp, Messenger, WeChat, Instagram, Snapchat, Twitter, etc. ? Zot fine être décrire couma bane réseaux sociaux ki ena pour but pour connecter bane dimounes du monde entier. Azordi, sa bane réseaux là ena plisse ki 2 billions d'utilisateurs à travers le monde et des milliers de bane dimounes connecter là-dans sak semaine. Et réseau social ki pli servi par sa bane dimounes là, c'est bien Facebook.

À Maurice et à travers le monde en entier, Facebook fine contigner prend ene l'ampleur terrible. De plus en plus de bane dimounes connecter et sa application là fine gagne beaucoup popularité. Zot tout astaire lor là, même bane zenfants 10 ans. Nous trouve là-dans tous bane couches sociales : bane stars de cinéma, bane artistes (chanteurs, danseurs, musiciens etc.), bane z'hommes politiques, bane travailleurs sociaux, bane étudiants, bane z'hommes, et ainsi ki bane femmes au foyer, etc.

Bien ki sa réseau là présente certains avantages, parski li permette, entre autres à bane dimounes pour trouve travail et pou retrouve bane membres de la famille

ou bane camarades ki zot fine perdi de vue dépi plusieurs l'années, mais selman ena là-dans plusieurs bane dangers, surtout pour nous, bane musulmans.

Facebook li ene réseau social, mais kan nous faire ene analyse approfondie, nous trouver ki li en fait ene réseau antisocial. Bane ki servi sa bane réseaux sociaux là zot souvent connecté en permanence avec sa, ki li dans la caze, et dans bureau. Certain jeunes, ki accros à Facebook, évoluer quasiment dans ene lé monde virtuel, kot zot déconnecté de la réalité. Beaucoup dimounes astaire préfère prend zot repas devant computer (ou Laptop/ Tablette/ Smartphone etc.), kot zot chat avec zot bane camarades virtuels ou zot zouer games lor Facebook. Zot népli trouve, entre autres, l'importance pou passe zot lé temps pour manger entre famille.

D'après Wahshi Ibn Harb (ra), bane *Sahaba* de Rassoollullah Hazrat Muhammad (saws) fine ene fois demande li: « *Ô Messenger d'Allah! Nous manger mais nous l'estoma pas rempli.* » Li fine dire zot: « *C'est peut-être ki zot pas manger dans ene place commun.* » Zot fine réponde: « *Oui* ». Li (saws) dire: « *Régroupe-zot tous autour de zot repas, prononce le nom d'Allah et zot manger pou béni pou zot.* » (Rapporté par Abou Dawud).

Le fait pou manger ensam renforce bane liens familiales, li encourage le dialogue et li en vérité apporte plisse bénédictions. L'Islam li ene religion ki contre l'individualisme, li encourage la sociabilité (c'est-à-dire, ki bane dimounes zoine ensam et ena ene la vie social, bien sûr, d'après bane limites de l'Islam !) et aussi ki tous bane croyants vive couma ene famille.

Facebook apporte aussi so part de narcissisme (c'est-à-dire, kot ene dimoune li tellement centrer lor li-même, kot li donne li-même beaucoup plisse l'importance, kot li faire ene fixation lor li-même, li admire et content li-même plisse ki bizin). Bane recherches de bane psychologues et de bane linguistes fine démontré ki bane pronoms personnels ki servi lors bane pages Facebook zot en grande quantité, kot bane dimounes bien souvent servi bane mots: 'moi', 'mo', 'moi-même', par rapport à bane mots collectifs couma 'nous', 'communauté', et 'humanité'. Bane utilisateurs là vine bien centrés lor zot-même et zot prend plaisir pou mette zot de l'avant et pou donne zot-même l'importance au niveau personnel. Zot créer soigneusement zot image virtuelle dans le but pou embellir zot profil lor sa réseau là. Ena ene déclin général dans le concept d'appartenance à la communauté et au groupe. Bane l'exemples d'ene individualisme croissant

zot certainement nombreux. Zot vante zot-même souvent ki (soi-disant) zot fine faire bane voyages à l'étranger, ki zot fine alle dans bane fêtes mondaines, ki zot fine faire bane activités sportives ou culturelles ki à la mode. Zot publier bane « supers » photos, souvent faussé, pou dire « *Mo encore pli bo (ou zoli) sous sa l'angle là.* » Zot ena tendance pou valorise zot, comme-ci pour dire « *Guettemoi* ».

Maintenant, la définition de la vie pour sa bane dimounes là résume à Facebook, Instagram etc. Zot perdi ene lé temps précieux pou scroll (ou fouille) bane pages indéfinis de zot bane camarades, familles et même bane étrangers ! Zot commenter, et poster bane photos et bane vidéos de zot bane activités personnels comme-ci zot la vie forme partie du domaine public et non privée ! Facebook, et bane les autres plateformes virtuels fine vine couma ene la drogue pour dimounes. Zot pas capave sans passe sa. Au lieu ki zot cause face à face et vivre ene la vie sain, sans « filters » dans photos et sans Photoshop, au lieu de sa, zot pé faire bane tels activités ki condamnables dans l'Islam.

Li vraiment malheureux pou constater ki beaucoup de bane musulmanes aussi fine rentre dans sa l'attrape là. Zot publier bane photos ou bane vidéos kot zot habiller de zot pli zoli linges pour bane fêtes, bane mariages et même à l'occasion de Eid, kot certains mette zot Hijab et bane les autres sans *Hijab* ! Zot fine fer sa *Hijab* là vine ene badinage, ene joujou. Allah, dans So sagesse infini, fine ordonne à bane madames pou pas expose zot par exprès devant bane étrangers et pou montrer zot parure zis avec zot *Mahrms*.

Ena plusieurs l'exemples dans Quran et Sunna, par exemple, verset 34 de Chapitre 33 (Surah Al-Ahzab):

« Reste dans zot la caze ; et pas montrer zot beauté pareil couma bane femmes avant l'Islam (*Jaahiliyah*) ti faire. »

Astaire là, c'est nous bane musulmanes ki pé comporte zot pire ki bane femmes dans l'époque *Jaahiliyah*. Lontan, pas ti ena bane réseaux sociaux ! Azordi, le monde entier conné saki nous bane musulmanes pé faire, ainsi ki pour tous nous bane frères musulmans d'ailleurs !

Alors couma certains bane madames et tiffles musulmanes capave mette zot de l'avant, kot zot embellir zot dans ene telle façon ozé, pour séduire le public ki

capave facilement gagne accès à sa bane z'images là ? Zot pas réaliser ki le monde de l'internet – avec tous zot bane détails, z'images et vidéos de zot la vie – et même bane smartphones zot bane z'outils ki capave facilement piraté. Zot pas en sécurité. Et sa li applique pour tous bane utilisateurs de bane réseaux sociaux.

L'Islam préconise so bane suivants pou reste dans la limite de la décence, et pou applique bane commandements divines afin ki nous être protégé contre bane mals de Satan. C'est bane aspects fondamental de l'Islam et li dommage ki zot banalise zot de sa façon là.

Azordi tous dimounes dire ki zot na péna létemps. Mais eski nous conne servi nous létemps ? Bane ki accros avec Facebook pas trouve létemps passer kan zot plonger dans bane games virtuels et bane les autres activités ki ena là-dans. Zot fine vine cyber-dépendants (c'est-à-dire, dépendent de sa lémonde internet là), et couma ene la drogue, zot pas capave s'en passe sa. Comme toute dépendance li dangéré, bane cas de suicides fine enregistré parmi bane grand utilisateurs de Facebook. Dès ki zot connecter avec sa, li vine difficile pou zot pou déconnecter avec sa. Zot vine de plus en plus curieux, kot zot oulé rode bane données (informations) personnelles lor la vie privée de sakaine, et aussi bane les autres kitchoses ki pas concerne zot.

D'après Abu Huraira (ra), le Messenger d'Allah (saws) fine dire : « *Parmi bane meilleurs pratiques de l'Islam pour quelqu'un, c'est pou délaisse tout saki pas concerne li.* » (Tirmidhi).

En plisse de sa, ena bane palabres, bane fausse news ki sorti là-dans (Facebook etc.) et kot sa démontrer l'égoïsme et même voyeurisme (kot bane dimounes épier ou dans bane façons bien malfaisant). Tout sa alle à l'encontre de saki l'Islam enseigne nous. Kan nous faire sa, nous néglige bane kitchoses ki beaucoup pli importants, voire essentielles, couma *Salaat* à l'heure prescrit ou la lecture et l'étude Quran Shareef.

Maintenant, tellement le monde fine vine accro à Facebook, ki fine bizin selecter ene jour sans Facebook ! Hier Jeudi le 28 Février 2019 ti la journée internationale sans Facebook! Mais, la réalité c'est ki nous bizin vivre nous la vie pleinement, couma sa ti bizin été, kot nous déconnecté de bane kitchoses virtuels et reste dans la limite de saki permette. Mo pas dire zot ki bane réseaux sociaux zot complètement mauvais. Loin de là, zot capave être même d'ene très grand aide,

mais zot bizin conner couma et quand servi li. Azordi avec la globalisation, nous, bane musulmans, nous fine gagne bane z'outils bien utiles à travers internet et bane gadgets sophistiqués de sa l'époque moderne là. Nous fine gagne sa opportunité là pou servi nous de sa bane z'outils là pour répanne l'islam, pou enseigne au monde la langue de la vérité, la langue de la spiritualité, et pou enrichir nous bane connaissances, tant spirituelles ki séculaires.

Alors anou servi de sa seulement dans le but pou plaire à Allah, en construizan et consolidant nous *Imaan* (la foi), et non pas pour plaire à nous égo et pou montrer lizié dimounes. Pas gaspille nous létemps ki tellement précieux dans bane kitchoses initiales. Pas alle cherche bane information ki pas pou profite nous en nannié, ki li dans sa le monde là et dans *Aakhérat*. Anou servi nous létemps pour rapproche nous de nous Créateur et pour faire bane kitchoses ki pour faire Li plaisir. La société bien bizin nous coup de main à tous les niveaux pour aide bane ki en détresse, bane démunis, bane orphelins. Bane parents bizin encourage zot bane zenfants pou mette zot au service de la communauté pendant le weekend ou bane vacances scolaires et pou pratique sport au lieu perdi zot lé temps et zot l'énergie inutilement lor bane réseaux sociaux.

Ki Allah aide nous bane petits et grands pou réalise bane dangers ki pé attane zot dans servi bane réseaux sociaux. *Ameen*.

Allah pour certainement aide nous, mais nous bizin faire bane z'efforts nécessaires pour abandonne bane pratiques inutiles et ki nuisibles à nous *Imaan* et pou mette tout en œuvre pour établir nous dans bane pratiques ki pou rapporte bane bons fruits, ki pou aide nous dans nous but pou répanne le message divine dans tous bane coins et recoins du monde. Nous ena bane z'outils ki bizin. Nous bizin appranne couma bien servi zot. Si zot pas sûr ki zot pas pou capave servi bane réseaux sociaux sans ki zot déramer, alors li préférable pou reste loin de tout sa là, et ki zot servi zot de zot bane talents de communications pour faire *Dawa/Tabligh*. Alle vers bane dimounes, invite zot vers Allah, vers So la Foi (l'islam). Le contact avec bane dimounes li bien plus meilleur ki le contact virtuel.

Ki Allah aide zot tous pou bien comprend sa Khutba là. Si zot ti bane accros de bane réseaux sociaux, maintenir astaire ene minimum de temps lor là. Pas gaspille zot létemps précieux dans le monde virtuel. Vive vraie la vie ki Allah fine donne zot, et faire Li plaisir en restant loin de bane interdits. *Insha-Allah, Ameen*.